

मार्निंग डोगरी न्यूज़ बुलेटिन, समें. 09-20 Hrs

<><><><><><>

Headlines

- लोकसभा चुनां दे 6में गेड़ तैह्त कल अनंतनाग–राजौरी संसदीय सीट च बी वोट पाए जांगन। 18 लक्ख 36 ज्हार शा मते मतदाता चुनां मैदान च खड़ोते दे 20 मेदवारें दे भविक्ख दा फ़ैसला करगंन।
- अनंतनाग–राजौरी सीट लेई कल 25 ज्हार शा मते कश्मीरी विस्थापत वोट पांगन।
- राजौरी दे जिला चुनां अधिकारी होरें मतदान लेई कीते गेदे प्रबंधें दा जायजा लैता।
- गर्मी दा प्रकोप अगले किश दिनें तगर जारी रौहग ते मौसम विभाग नै लोकें गी गर्मी थमां बचने दा आग्रह कीता ऐ।

<><><><><><>

Anantnag-Rajouri

कल लोकसभा चुनां दे 6में गेड़ तैह्त अनंतनाग–राजौरी संसदीय सीट च बी वोट पोआए जांगन। 18 लक्ख 36 ज्हार मतदाता चुनां मैदान च खड़ोते दे 20 मेदवारें दे भविक्ख दा फ़ैसला करगंन। सीईओ आस्सेआ थहोइ दी जानकारी मूजब कुलगाम, अनंतनाग, पुंछ, शोपियां ते राजौरी च 18 लक्ख 36 ज्हार 576 वोट न, जिंदे च 9 लक्ख 33 ज्हार 647 मर्द ते 9 लक्ख 2 ज्हार 902 महिला ते 27 ट्रांसजेंडर मतदाता शामिल न। चुनां आयोग नै अनंतनाग–राजौरी संसदीय सीट लेई 2 ज्हार 338 मतदान केन्द्र बनाए दे न। हर इक मतदान केन्द्र च प्रिसाइडिंग अफसरें सनें लोड़चदे चुनावी अमले गी सरबंधत मतदान केन्द्र च तैनात कीता जाग। 9 ज्हार शा मते चुनावी अमलें गी चुनावी ड्यूटी लेई तैआर कीता गेदा ऐ। राजौरी ते पुंछ दे बन्ने कन्नै लगदे इलाकें च 19 मतदान केन्द्र स्थापत कीते गेदे न। मतदान बडलै 7 बजे शा लेइयै संजा 6 बजे तगर चलोग ते जेकर कुसा बी मतदान केन्द्र च वोटरें दियां लम्मियां–लम्मियां रींगा लगी दियां होंगन तां उत्थें मतदान दा समां बघाई दित्ता जाग। हर इक मतदान केन्द्र च पानी, बिजली, शौचालय, बौहने दी थाहर, शामयाना ते बुर्जुगें ते दिव्यागजनें लेई व्हील चेयर दी सुविधा गी जकीनी बनाया जाग।

<><><><><><>

Migrant Voters

25 ज्हार शा मते विस्थापत कश्मीरी पंडित 25 मई गी 6में गेड़ तैहत अनंतनाग-राजौरी संसदीय सीट लेई वोट पाए जांगन। इस गेड़ तैहत देश दिएं 58 लोकसभा सीट लेई वोट पोआए जांगन। आकाशवाणी दे जम्मू संवाददाता होरें जानकारी दित्ती ऐ जे प्रशासन नै एह्दे लेई व्यापक प्रबंध कीते दे न। जम्मू च 29, उधमपुर च इक ते दिल्ली एनसीआर च 4 मतदान केन्द्र स्थापत कीते गेदे न। जम्मू च 29 मतदान केन्द्रें चा 8 सहायक मतदान केन्द्र न जिंदे चा 2 चिनोर दे गौरमैट मिडल स्कूल च 2 मुट्ठी दे गौरमैट हायर सकेँडरी स्कूल च, 2 जगटी टाउनशिप च ते 1-1 मतदान केन्द्र कृषि परिसर उदयवाला, बोहड़ी ते बरनाई दे अनुराधा हायर सकेँडरी स्कूल च स्थापत कीता गेआ ऐ। एह्दे इलावा मतदान केन्द्रें च सीसीटीवी दी सुविधा, पीने आले पानी, शामयाने ते ट्रांसपोर्ट दी सुविधा दित्ती जा'रदी ऐ। पैहली बारी वोट पाने आलें गी तोहफे बी दित्ते जा'रदे न।

<><><><><><>

DEO Rajouri

राजौरी दे जिला चुनां अधिकारी ओम प्रकाश भगत होरें कल जोनल ते सेक्टर अफसरें कन्नै बैठक लोआइयै कल अनंतनाग-राजौरी चुनावी हल्के च होने आले चुनां लेई कीते गेदे प्रबंधें दा जायजा लैता। मीटिंग च चुनां प्रक्रिया गी निरपक्ख, आज्ञादाना ढंगा सिर तोड़ चाढ़ने सरबंधी प्रक्रिया उप्पर तफसीली चर्चा कीती गई। सेक्टरल अफसरें गी मतदान केन्द्रें दा निरीक्षण ते सुरक्षा कर्मिं दे समें उप्पर तैनाती गी जकीनी बनाने दे निर्देश दित्ते गे।

<><><><><><>

DEO Poonch

जिला चुनां अधिकारी यासीन एम.चौधरी होरें कल इक बैठक लाइयै 25 मई गी होने आले लोकसभा चुनां दे 6में गेड़ लेई कीते जा'रदे प्रबंधें गी मुकदा रूप दित्ता। बैठक च इस गल्ल उप्पर मता तब्जो दित्ती गई जे चुनां प्रक्रिया गी पूरी चाल्ली निरपक्ख बनाने गी जकीनी बनाया जा। सेक्टर ते जोनल अफसरें गी मतदान दे पैहले मतदान आले ध्याड़े ते ओह्दे बाद दी गतिविधिं सरबंधी उंदियां जिम्मेदारिं बारे जानकार कीता गेआ। बैठक च मतदान केन्द्रें च बिजली, पानी, दपैहरी दी रूट्टी, सुरक्षा बवस्था ते समें उप्पर ईवीएम मशीनें गी चुनावी अमले तगर पजाने बारे बी तफसीली चर्चा कीती गई। सेक्टरल अधिकारी गी निर्देश दित्ते गे जे ओह सुरक्षा कर्मिं दी तैनाती ते मतदान केन्द्रें दा मुआइना समें उप्पर करन।

<><><><><><>

PM-Interview

प्रधानमंत्री ते भारतीय जनता पार्टी दे सीनियर लीडर नरेंद्र मोदी होरें आखेआ ऐ जे 2014 दे लोकसभा चुनाव च भ्रष्टाचार ते 2019 च लाभार्थियों दा मुद्दा मुख्क हा ते 2024 आहले चुनाव दा मुख्क मुद्दा विकसित भारत दा ऐ। अंग्रेजी इक्क अखबार कन्नै गल्ल कत्थ करदे होई उनें आखेआ जे देसै दी जनता इस लोकसभा चुनाव गी महत्वै आहला मनदी ऐ की जे चुनाव देसै दी आसें—मेदे दी रफतार कन्नै विकसित भारत दा लक्ष्य हासल करने लेई ऐ। श्री मोदी होरें दावा कीता जे इस बारी बी एम.बी.ए गी उनें वोटरें दा समर्थन थहोग जिनें पिछले लोकसभा चुनाव च समर्थन दिता हा। प्रधानमंत्री होरें गलाया जे इस बारी दे लोकसभा चुनाव च भ्रष्टाचार बरोधी ते लाभार्थी मतदाता उंदे कन्नै न। उनें गलाया जे भारत दे तेजिया कन्नै विकास दी तांग रखने आहला वर्ग उनेंगी ते भाजपा गी समर्थन देआ रदा ऐ। उनें गलाया जे बैंकिंग, प्रत्यक्ष विदेशी निवेश, नियमें दी अमलावरी, कारपोरेट टैक्स, इंकम टैक्स ते मौद्रिक नीति च सुधारें दे नतीजे च हुन भारत दुनिया दी 5मी सब्बनें शा बड्डी अर्थ बवस्था बनी गेदा ऐ।

<><><><><><>

ACD Ramban

रामबन जिले दे विकास विभाग दे असिस्टेंट कमीशनर श्रीनाथ सुमन होरें कल बटोत दा दौरा लाया ते उत्थें दे ब्लाके च आरडीडी स्कीम तैहत् चला'रदे विकास कर्में दा जायजा लैने आस्तै इक्क बैठक दी अध्यक्षता कीती। असिस्टेंट कमीशनर होरें बक्ख—बक्ख स्कीमें बारे सिलसिलेवार जायजा लैता ते कर्में गी तैह् समें दे अंदर पूरा करने पर जोर भरेआ। उनें मनरेगा ते प्रधानमंत्री अवास योजना तैहत् चला'रदे धरें दे निर्माण कर्में दा बी जायजा लैता। उनें ग्रामीण विकास मैह्कमे दे अधिकारिणं गी अपील कीती ऐ जे ओह् हर पंचैत च चला'रदे कर्में च तेज आहनन ते लोकें गी इनें स्कीमें दा लाह हासल करोआन।

<><><><><><>

Heat Wave

मौसम विभाग नै जम्मू कश्मीर च अगले किश दिनें गर्मी दे प्रकोप दे जारी रौहने दी शँका जताई ऐ। मौसम विभाग दे इक्क अधिकारी नै गलाया ऐ जे आम तौरा उप्पर मौसम दे खुश्क रौहने दी मेद ऐ, पर कुसै/कुसै थाहर उप्पर गरज चमक कन्नै बरखा बरने दी मेद ऐ। 29 मई शा 31 मई तगर मौसम आंशक तौरा उप्पर बदलौरखडा रौहग ते कुसै—कुसै थाहर हल्की बरखा पौने दी बी मेद ऐ। उनें आखेआ जे अगले 6 दिन जम्मू ते कश्मीर संभाग दे मैदानी इलाके च तेज गर्मी पौग ते पहाड़ी इलाके च बी मौसम गर्म ते खुश्क रौहग।

मौसम विभाग नै लोकें गी गर्मी थमां बचने लेईं घरै अंदर रौहने ते मते थमां मता पानी पीने दी सलाह जारी कीती ऐ। श्रीनगर च जंदी रातीं दा तापमान 15 डिग्री सैल्सियस ते जम्मू च 24 डिग्री सैल्सियस रेआ जेहड़ा समान्य थमां मता ऐ।

<><><><><><>

Accident

जम्मू खित्ते च होए दे शिड़क हादसे च चऊं लोकें दी मौत होईं गई ऐ। इक प्यो ते पुत्तर दी मौत उसलै होईं जिसलै ओहू अपने घर परतोआ दे हे ते इक तेज रफतार च आवा'रदे डैम्पर हेठ आईं गे। कोरपुन्नु ग्रां दे लोकें डरैवरे दी लापरवाही खलाफ विरोध प्रदर्शन कीता ते शिड़का पर धरणा दित्ता जे उंदी वजह कन्नै बेकसूर लोकें दी मौत होंदी ऐ। किशतवाड़ जिले दे वारवन इलाके च बी शिड़क हादसे च दऊं लोकें दी मौके पर गै मौत होइ गई ऐ। एह हादसा उसलै पेश आया जिसलै ओहू अपनी गड्डी च अनंतनाग जा'रदे हे ते उंदी गड्डी शिड़का परां तलैटियै डूहंगी खाईं च जाईं पेईं। जियां गै घटना बारे जम्मू कश्मीर पुलस गी पता लगा, उनें मकामी लोकें कन्नै रलियै बचाह अणियान चलाया ते दौनें लोथें गी उत्थुआं बाहर कडिड्यै वारवन दे प्राथमिक सेहत केन्द्र च पजाया जित्थें उनेंगी मोए दा घोषत करी दित्ता गेआ ते मगरा उंदी लोथें गी उंदे परोआर आलें गी सोपी दित्ता गेआ।

<><><><><><>

DC-Kishtwar

किशतवाड़ दे डिप्टी कमीशनर डॉ. देवांश यादव होरें कल शिक्षा इदारे दे सुचारू कम्मकाज ते समें दी पाबंदी गी जकीनी बनाने लेईं नागसेनी जोन दे कलस्टर डूल च स्कूलें दा बगैर इतलाह दित्ते दे निरीक्षण कीता। डिप्टी कमीशनर होरें इनें इदारे च शैक्षणिक बुनियादी ढांचे दी बी समीक्षा कीती। अपने दौरे दरान डिप्टी कमीशनर होरें हाजरी गी ट्रैक करने च सेही ते भरोसे गी जकीनी बनाने आस्तै बायोमैट्रिक हाजरी दी महत्ता पर जोर भरेआ ऐ। डॉ. यादव होरें सब्बने अध्यापकें गी हिदायतां जारी कीतियां जे ओहू समें दी पाबंदी दा ख्याल रखन ते अनुकूल सिखलाई दा म्हौल बनाईं रखन।

डिप्टी कमीशनर होरें कुडिं दे हायर सकेंडरी स्कूल च स्टेम लैबें च चला'रदे कम्मं दा बी निरीक्षण कीता। उनें विद्यार्थिं गी जोर देइयै आखेआ ऐ जे ओह् उनेंगी इनें लैबें थमां फायदा हासल होग जेह्दे नै विज्ञान दे विद्यार्थिं दे ज्ञान च बाद्धा होग। उनें विद्यार्थिं गी लाइब्रेरी दा पूरा-पूरा इस्तेमाल करने लेई बी गलाया।

<><><><><><><>

Youth Training

केन्द्रीय सूचना ते प्रसारण सचिव संजय जाजू होरें कल गलाया ऐ जे राष्ट्रीय उत्कृष्टता केन्द्र नोजवानें गी एनीमेशन ते विजुअल अफैक्टें उप्पर सिखलाई देग। चेन्नई च पत्रकारें कन्नै गल्ल करदे होई उनें गलाया जे फिल्म निर्माण च 3 लक्ख करोड़ रपे दे उद्योग गी आधुनिक तकनीकें दे बक्ख-बक्ख पैहलुएं च कौशल दी लोड़ ऐ। उनें गलाया जे उत्कृष्टता केन्द्र उद्योग जगत दी जरूरतें गी पूरा करोग। सचिव होरें सूचना ते प्रसारण दे मीडिया प्रमुखें दे कन्नै बी चर्चा कीती ते उनेंगी मंत्रालय दे उद्देश्यें गी अग्गे बधाने लेई इक रूपरेखा तैआर करने लेई गलाया। सचिव होर कल चेन्नई च इक दिने दे दौरे उप्पर हे।

<><><><><><><>

IPL

अज्ज आईपीएल क्रिकेट च सनराईजर्स हैदराबाद ते राजस्थान रॉयल्स कन्नै चेन्नई दे एम.ए.चिंदबरम स्टेडियम च दुआ क्वालीफायर मैच खेड्डेआ जाग। मैच भारती समें मताबक संजा साढे 7 बजे शुरू होग। कोलकाता नाईट राईडर्स सनराईजर्स हैदराबाद गी हराइयै पैहले गै फाइनल च पुज्जी गेदा ऐ।

<><><><><><><>